



## AYUNTAMIENTO DE LAKUNTZA

### UDAL IGERILEKUAK

#### BARNE ARAUBIDEAREN ERREGELAMENDUA.

##### I. KAPITULUA

###### *XEDAPEN OROKORRAK*

1. artikulua. Erregelamendu honen xede nagusia Lakuntzako Udalaren igerilekuen erabilera arautzea da.

Udalaren instalazioak dira, bai igerilekuak eta berdeguneek osatzen duten eremua, bai jarduera ludikoetan aritzeko gainerako eremuak.

Horien barnean sartuko dira, halaber, aipatutako jardueri loturik eta aurreko paragrafoan azaldu diren instalazioetan kokaturik dauden ondasun higigarriak, instalazioak eta zerbitzuak.

2. artikulua. Instalazioetan sartzen ahalko dira Lakuntzako Udalak horretarako ezartzen dituen baldintzak betetzen dituztenak.

3. artikulua. Instalazio bakoitza erabiltzen ahalko da harentzat aurreikusitako xede diren edo hari dagozkion kiroletan aritu eta/edo jarduerak egiteko.

4. artikulua. Udalak zehaztuko du instalazioak zein alditan egonen diren itxita, udaldiaren iraupena zein izanen den eta zer ordutan irekiko diren jendearentzat.

5. artikulua. Udalaren instalazioetan kartela paratuko da, Udalak onetsia, erabiltzaileek ongi ikusteko moduko tokian, ondoko jakingarri hauek azaltzeko:

–Instalazioa erabiltzeko prezioak.

–Jardueraren ordutegia.

–Erabiltzaileen kopurua, edukiera eta ezaugarri tekniko aipagarrienak.

–Egiten diren zerbitzuak edo programak.

Kontsultatu ahal izateko eskura dagoen tokiren batean utziko da erregelamendu honen ale bat.

##### II. KAPITULUA

###### *ABONATUAK*

6. artikulua. Abonatua izateko, Udalak finkatzen dituen kuotak ordainduak izan behar ditu.

Abonatuek sarrera librea izanen dute instalazioetan.





7. artikulua. Abonatu motak.

7.1. Abonatu motak eta horiei dagozkien kuotak erregelamendu honen I. eranskinean aipatzen direnak izanen dira.

7.2. Lakuntzako Udalak ezartzen dituen kuotak ordainduko dituzte abonatuak.

8. artikulua. Baja eman nahi duen abonatuak idatziz jakinarazi beharko die Udaleko administrazioko langileei.

9. artikulua. Abonatuak honako eskubide hauek dituzte:

9.1. Instalazioetan libreki sartzea, abonatu txartela erakutsita, jendearentzat irekita dauden egun eta orduetan.

9.2. Instalazioak erabili ahal izatea, Udalak onesten duen araudiari jarraituz.

9.3. Kirol ikastaroetan izena ematea, Udalak haietarako onesten duen araudiarekin bat.

9.4. Egoki iruditzen zaizkien erreklamazioak eta iradokizunak egitea instalazioen funtzionamenduaren gainean.

10. artikulua. Abonatuak beharturik daude erabiltzaileentzat, oro har, ezartzen diren beharkizunak betetzera.

### III. KAPITULUA

#### **ABONATU GABEAK**

11. artikulua. Abonatu ez direnak honako modu honetan soilik sartzan ahalko dira instalazioetan:

–"Eguneko sarrera".

–"Kirol ikastaroren" batean izena emanda.

11.1. Eguneko sarrerak aukera ematen du instalazioa egun osoan erabiltzeko.

11.2. Kirol jardueraren batean inskribaturik dauden abonatu gabeek ezarri den tasa ordainduko dute, eta bakar-bakarrik sartzan ahalko dira jarduera horrek dirauen bitartean.

Jarduera hori amaitu ondoren, pertsona horiek ezin izanen dute jarraitu instalazioak eskaintzen dituen zerbitzuak erabiltzen.

Aurreko lerroaldean ezarritako arauak bete ezean, pertsona horiei ohartarazpena eginen zaie, eta berriro ere hutsegite berdina egiten badute, jardueran baja emanen zaie, hartan jarraitzeko eskubide oro galduko dute eta ezin izanen dute kuota itzultzeko eskatu.

Udalak finkatuko ditu abonatu gabeek instalazioak erabiltzeko prezio publikoak.





## IV. KAPITULUA

### **INSTALAZIOEN ERABILERAREN GAINEKO ARAUDIA**

12. artikulua. Erabiltzaileen betebeharrak:

12.1. Instalazioak eta zerbitzuak egoki eta zuzen erabiltzea.

12.2. Gainerako abonatu edo erabiltzaileekin begirunez jokatzea.

12.3. Ezarritako kuotak garaiz ordaintzea.

12.4. Instalazioen erabilerari buruz ematen diren arau eta jarraibideak onartu eta betetzea.

12.5. Udalak ezartzen dituen zehapenak betetzea.

12.6. Udalaren kirol instalazioen barrenean, helduek arduratu beharko dute beren ardurapean dituzten adingabeen segurtasunaz.

12.7. Adin nagusiko erabiltzaileek erantzun beharko dute, baldin eta beren ardurapean dituzten adingabeek erregelamendu honetako arauak betetzen ez badituzte edo bertan zehazturiko arau-hausteak egiten badituzte.

12.8. Erabiltzaileek onartu beharko dituzte instalazioetan gertatzen diren objektu pertsonalen galerak, baldin eta desagertu edo hondatzen badira.

12.9. Instalazioaren erabiltzaileek zorrotz bete beharko dituzte ireki eta ixteko orduak, eta ezin izanen dira, inolaz ere, ixteko ordua baino denbora gehiago gelditu.

12.10. Erabiltzaileek erantzun beharko dute, baldin eta Udalaren kirol instalazioetan ematen duten denboran asmo txarrez edo zabarkeriaz kalte edo galerarik eragiten badiete instalazioei edo hirugarrenei.

12.11. Txartela aurkeztea Udalaren instalazioetan sartzean, eta instalazioko langileek eskatzen dietenean. Norbaitek instalazioetan sartzean txartela aurkezten ez badu, administrazioko langileek sarrera debekatuko diote.

13. artikulua. Zerbitzu eremua.

13.1. Zerbitzu eremua esaten zaion aldean sartzeko dira aldagelak, dutxak, zerbitzuak eta botika-kutxa.

13.2. Erabiltzaileek lagunduko dute instalazioa garbi egon dadin, langileekin lankidetzan ariz, eta instalazioko bazter guztietan dauden paperontziak eta hautsontziak erabiliz.

–Erabat debekatuta dago igerilekuen eraikinaren barnean erretzea.

13.3. Erabiltzaileek errespetatu eta zaindu beharko dituzte altzariak, bankuak, lorategiak, arbolak etab.

13.4. Erabiltzaileek errespetatu beharko dituzte instalazioko ordutegiak, kasu eginez horretarako langileek egiten dizkieten oharrei.

13.5. Gainerako erabiltzaileak ere beti errespetatu beharko dira.





13.6. Telefonoa publikoa izanen da, eta izanen du funtzionatzeko sistema bat, Udalari deien kostua eskuratzeko manera emanen diona.

13.7. Botika-kutxa bat izanen da erabiltzaileen eskura, eta soroslearen ardurapean egonen da igerilekuen bainu ordutegian.

13.8. Txankletak erabili beharko dira aldageletan eta dutxen aldean.

14. artikulua. Igerilekuak.

Igerilekuak erabiliko dira bainatzeko, igeri egiteko nahiz, kasua bada, lehiaketak egiteko, betiere igerilekuan ongi zehazturik bakoitzari dagokion aldea. Alde horiek errespetatu egin beharko dira beti.

Igerilekuetan, soroslea da (eta instalazioko gainerako langileak) haien funtzionamenduaren gaineko arduradun nagusia, eta betearazi beharko ditu Udalak ematen dituen arauak, instalazioak zentzuz erabiltzeko eta bainulari guztien segurtasuna zaintzeko beste xederik gabe.

Sorosleek aginpidea dute instalazioak gaizki erabiltzen dituztenei kargu hartzeko eta, azken neurri gisa, igerilekutik bidaltzeko, baldin eta bazterrak nahasi, ekipamendua gaizki erabili eta/edo erabiltzaileen osotasun fisikoarentzat arriskutsuak baldin badira.

Sorosleen eginkizuna eta beharkizuna da igerilekuko erabiltzaile guztien segurtasuna zaintzea; adingabekoen gurasoak edo legezko tutoreak dira beren seme-alaben arduradun nagusiak, bereziki igeri egiten ez badakite.

Instalazioetako langileek ahalmena dute portaera gaitzesgarria duten erabiltzaileei kargu hartzeko edo instalaziotik bidaltzeko, baldin eta gainerako erabiltzaileenganako begirunerik ez badute.

14.1. Urgunea, sarbidea eta egonaldia.

–Erabiltzailea ezin da igerilekuan sartu kaleko arropa eta oinetakoekin.

–8 urtetik beherakoak ezin izanen dira jolas-igerilekuan bainatu, arduradun batekin batera ez badabiltza behintzat.

–Haurrentzako putzuan haur txikiak soilik (0-7 urtekoak) ibil daitezke.

–Igerilekuen eremuan sartu aurretik oinak garbitzeko putzutik pasatu beharko da, eta bainujantzian sartu.

–Ezin izanen dira igerilekuetan ibili eritasun infekzio-kutsakorren bat, zauri irekiak etab. dituztenak. Erabiltzailearen batek halako infekzioa duelako susmo sendoa badute instalazioetako langileek, medikuaren baimen idatzia aurkezteko eskatzen ahalko diote, igerilekuan sartu ahal izateko.

–Nahitaezkoa da dutxatzea bainua hartu baino lehen.

–Nahitaezkoa da txanoa janztea.

–Nahitaezkoa izanen da hurrek, oso txikiak izan arren, pixoihala edo galtzazapia erabiltzea.





–Debeku da laster, jauzi edo bultza egitea, eta orobat gainerako erabiltzaileentzat gogaikarria edo arriskutsua izaten ahal den beste zernahi, eta oro har gainerako erabiltzaileei traba egiten ahal dien edozein gauza.

–Debeku da igerilekuaren eremuan jatea.

–Ezin dira erabili erabiltzaileen segurtasunerako arriskutsuak diren elementu edo gauzak, arriskutsuak berez edo hautsiz gero.

–Debeku da gainerako erabiltzaileentzat trabagarri diren elementuak sartzea (baloiak, koltxonetak, hegalak, urpean ibiltzeko betaurrekoak etab.), kirol instalazioak antolatzen dituen josteta jardunaldietan edo berariazko ikastaroetan izan ezik.

–Igeri egiteko betaurrekoak erabil daitezke.

–Debeku dira higienearen aurkako portaerak, baita uraren kalitatea txartzten ahal dutenak ere.

–Debeku da igerilekuen nasetan erretzea.

–Igerilekuetako dutxetan ezin da xanpurik edo gorputza garbitzeko beste edozein produkturik erabili.

–Igerilekuen nasetara ezin da eskuoihalekin edo bainu-txabusinekin pasatu, kirol jardueretan edo ikastaroetan eta eguraldiarengatik komeni denean izan ezik. Halakoetan, aulki batzuk jarriko dira behar horri erantzuteko.

–Berariazko eremu batzuk jarriko dira bai igeri egiteko ekipamenduentzat bai ikastaro egileentzat, kortxo-ilaraz markatuta.

–Igerilekuen barnean robota dagoenean ezin izanen da bainatu.

–Debeku da igerilekuak eta ingurunea bereizten dituen hesiaren gainetik jauzi egitea.

#### 14.2. Bainu aldea.

–Erabiltzaileak erabiliko ditu beste xede batzuetarako (ikastaroak, entrenamendua...) mugaturik ez dauden parteak.

–Izena eman dutenek eta ikastaroetan soilik erabiltzen ahalko dute ikastaroetarako ematen den materiala (taulak, flotatzeko mahukak, ikasmateriala...).

–Debeku da igerilekuko kortxoetatik zintzilikatzea edo haiei lotzea.

–Bainu libreko erabiltzaileek ezin izanen diete ikastaro egileei edo igerilariei agiraka egin, bultzatu edo traba egin.

#### 14.3. Ikastaroak eta entrenamenduak.

Programaturiko jardueraren batean izena eman duten erabiltzaileek kasu eginen diete monitoreek emandako aholku eta aginduei, jardueren gainean edo instalazioak erabiltzeko moduaz, eta errespetatuko dituzte erregelamendu hau eta indarra duen araudia.





–Denek bete beharreko arauak.

- Debeku da era guztietako animaliak sartzea, berriazko lizentzia bat baimendurik izan ezik (itsu-txakurrak). Gida-txakurrak.
- Debeku da 9 urtetik beherako haurrak sartzea beren gurasoekin edo arduradun heldu batekin batera ez badaude.
- 9 urtetik beherako haurrak abonatu ahal izateko, agerrarazi beharko da badela instalazioan abonatu-tako adin nagusiko bat, haurraz arduratuko dena.
- Jendetasuneko gutxieneko arauak betez jokatu beharko dute denek.
- Debeku da instalazioetako sartzea txartela edo sarrera aurkeztu gabe.

–Ordutegiak.

- Igerilekuak goizeko 10:45tik arratsaldeko 20:15era arte egonen dira irekita.
- 20:30ean berdegunea utziko da eta 20:30ean aldagelak itxiko dira.

–Berdegunea.

- Ezin izanen da kristalezko ontzirik, botilarik edo bestelakorik erabili.
- Zigarrokinak, bilgarriak etab. paperontzietara bota beharko dira, eta zigarroak behar bezala itzalita.
- Ereku horretan jokoetan arituz gero, jokatzeari utzi beharko zaio erabiltzaileei eragozpenak sortzen bazaizkie (baloiak, erraketak etab.).
- Edozein oinetako motarekin sartzen ahalko da eremu horretan.
- Aulki eta hamaka txikiak jartzerik izanen da. Eguztikatoak ez.

–Aldagelak.

- Erabiltzaileei eskatzen zaie aldagelak txukun erabiltzeko, batez ere garbiketari dagokionez.
- Goizeko 10:30etik gaueko 20:30era arte egonen dira irekita.
- Nahitaezkoa da txankletak edo bainuko oinetakoak erabiltzea.

–Arauak ez betetzea.

- Alkateak edo, bestela, ordezkari zinegotziak zilegi izanen du arauak betetzen ez dituenari zehapena ezartzea txartela kenduz edo instalazioetan sartzea aldi batez edo betiko debekatuz.
- Arauak irekita daude, haietan bildu ez den edozein arazori dagokionez. Horiek Udalak aztertuko ditu eta bidezkoa den ebazpena emanen du.
- Erreklamazio orriak daude, instalazioen eta zerbitzuen funtzionamenduari buruzko kexak edo iradokizunak jasotzeko.

## V. KAPITULUA

### **ZEHAPENEN ARAUBIDEA**

#### 15. artikulua. Hutsegite arina.

Hutsegite arinen jakinarazpena ohartarazpen idatziaren bitartez egingen da, eta bertan zehaztuko dira arazoia eta hutsegitearen eguna.





–Hutsegite arinak dira:

- Instalazioa garbi ez edukitzea.
- Ezarri diren eremuetatik kanpo erretzea.
- Instalazioko funtzionamendu orduak ez errespetatzea.
- Gainerako abonatuak ez errespetatzea.
- Igerilekura kaleko arropa eta oinetakoak jantzita sartzea.
- Bainua hartu baino lehen ez dutzatzea.
- Txankletarik edo bainurako txanorik ez erabiltzea.
- Lasterka ibiltzea, jauzi edo bultza egitea, eta orobat gainerako erabiltzaileendako gogaikarria edo arriskutsua izaten ahal den beste zernahi, eta oro har gainerako erabiltzaileei traba egiten ahal dien edozein gauza.
- Ezarritako eremutik kanpo jatea.
- Erabiltzaileen segurtasun fisikorako arriskutsuak diren elementu edo gauzak erabiltzea, arriskutsuak berez edo hautsiz gero.
- Gainerako erabiltzaileei traba egiten ahal dieten gauzak sartzea (baloiak, koltxonetak, hegialak, urpeko betaurrekoak eta abar).
- Higienearen aurkako portaerak, baita uraren kalitatea txartzen ahal dutenak ere.
- Igerilekuko kortxoetatik zintzilikatzea edo haiei lotzea.
- Ikastaro egileei edo igerilariei agiraka egin, bultzatu edo traba egitea.
- Langile arduradunen aginduei kasu ez egitea.

16. artikulua. Hutsegite larria.

3 hutsegite arin baino gehiago egitea hutsegite larria izanen da.

Alkatetzak du hutsegite larriaren ondoriozko zehapena jartzeko eskumena. Hutsegite larriak aldi baterako kanporatzea dakar; zehazki, hiru egunetik hilabetera bitarte.

–Hutsegite larriak dira:

- Materialetan edo instalazioetan beretan kalteak egitea.
- Instalazioetako langile arduradunak ez errespetatzea.
- Drogak hartu direla edo alkohola edan dela nabarmen erakutsiz sartzea instalazioetan.

17. artikulua. Hutsegite oso larria.

Hutsegite oso larria egitearen ondoriozko zehapena instalazioetatik hilabete baterako baino luzaroago kanporatzetik abonatu izaera galtzera bitartekoa izanen da. Udaleko Batzordearen edo alkatearen erabakiz ezarriko dira zehapenak. Idatziz jakinaraziko dira, hartu-agiria barne, arrazoia, eguna eta erabakitako zehapena zehaztuta.

–Hutsegite oso larriak dira:

- Instalazioetan sartzeko txartelak edo bertako giltzak faltzutzea.
- Instalazioko materiala edo beste erabiltzaileen ondasunak lapurtzea eta ebastea.
- Instalazioko erabiltzaileei edo bertako langileei erasotzea.
- Instalazioen barnean drogak saldu edo kontsumitzea.





**LAKUNTZA**  
Udala • Ayuntamiento  
CIF: P-3113700-C

Herriko Plaza, 1 · C.P.: 31830 Lakuntza  
Tfno.: 948 57 60 15 · Fax: 948 56 72 60  
info@lakuntza.eus · www.lakuntza.eus

## AZKEN XEDAPENA

Erregelamendu honek Nafarroako Aldizkari Ofizialean osorik argitara eman eta biharamunean hartuko du indarra.